

# Ino Turakki Judas

## Ino Mapeafu Sitawa Turak

Iyawa turak, neturakki Judas a kolaki Santiago sino manguruwira, udde ammetam ammuweno agyananda. Ino gafuna a netura'nga yaw, aneno nedaggera sikwara a nanuldu si bakkanna gakkurug. Sapitanda si damana nu narakkattino aggangweno manguruwira, se pakomanira kappayi Dios gafu sino angngikalla'nga. Antuweno nanurakki Judas sikwara takesi ipaawa'na sikwareno kinarakka'nenno aggangwerenaya massan mangurug andino kakastiguwandana. Sinapi'na kappay sikwara si lawaranda nadda manuntul sino kakuruwana tulduwa naggabwat ki Dios.

## Ino Bagga'na Yaw

Ino gafuneno turak *1-2*

Ino gakkanna yawa turak *3-4*

Ino nangastiguwani Dios sino nalliwatira si'in *5-7*

Ino aggangweno manulduwera si bakkanna gakkurug andino  
kakastiguwandana *8-13*

Ino nelabbuni Enoc mapeafu sino kaukuman annino kakastiguwandana  
*14-16*

Ino nelabbunino apostolira a ananeno massan manguruwira *17-19*

Ino nassapitani Judas si pattuyagganda naddino angngurudda takesi  
fustuweno aggangwara *20-23*

Ino karara paddayaw ki Dios *24-25*

---

## Ino Gafuneno Turak

<sup>1</sup>Ikkanki Judas a kolaki Santiago a nanurak sitaw. Tataka masserbi ki Jesu Kristo. Antuyawino turakku sikwayuwa piniliyi Dios Ama. Ikkayuweno angammanna anna imutanna kiyad sino puliyani Jesu Kristo. <sup>2</sup>Madadagganan naddino ammuyu sino angngikallak, siyana'nga nakam, anna aggangamma maggabwat ki Dios.

**Ino Gakkanna Yawa Turak: Anereno Massalasangku Manguruwa  
Nedagga Sino Manguruwira  
(2 Ped. 2:1-22)**

<sup>3</sup>Ikkayuwa iiddukangu, manurakka'ngad sikwayu mappeafu sino kesalakantam ammina mangurug, se antuweno anggangkuwa sapitan sikwayu. Udde ammek netuluya neturak inay, se dinandangkuwa maawag si tunantakayu ta iyekwayungke ino damayuwa manuntul anna mimut sino angnguruddama netalakki Dios sikwatama tolena takesi ammenan nad maangkakwa. <sup>4</sup>Se aneno tolayira a ammera dandammanni Dios a nedagga sikwayu a ammera nepaiteno narakkatta gakkadda anna gagangera. Angkakwandeno kakuruwan mappeafu sino angngikallakki Dios, se sapitanda si damana kanuwa mangweno manguruwira si massiki sanna a narakkatta panggammanino baggira, se naallak kanuwi Dios. Ammayanda kappayino kakuruwan mappeafu ki Jesu Kristo a antu pelangino Afutama passerbiyantam. Nelabbun si'in ino kakastiguwanda sino neturakka sapiti Dios.

**Ino Nangastiguwani Dios Sino Nalliwatira Si'in**

<sup>5</sup>Naammuwandawin amminino ituldu'nga sikwayu mappeafu sino nangastiguwani Dios sino nalliwatira si'in, udde anggangku kappaya ipadandam sikwayu. Dandammandonadda nesalaki Diosino tolenera sin nifuyutanna sikwara a inanaw sey Egipto, udde kasena kinastiguweno ammera nangurug sikwana e natayira. <sup>6</sup>Dandammandonabbayino anghelira a amme nikalow sino kalintiyana neya'da i Dios sikwara, nu ammera lud inanawanino fustuwa pagyananda sey langit. Gafu se inanawira sinay, kinadenanira i Dios si kadena a ammena maari, e nebalunnera sino lammuk makkiyad sino awa pangukumanna si ammin. <sup>7</sup>Dandammandokappenaddino naganira sey Sodoma anna Gomorra andino wewe'nginda a lulubbun. Ino nalliwatanda, nekunna sino nalliwatan inayira a anghel, a nangwera si bakkanna kalintiyanda a akwan, se dinuruddeno bakkanna atawara, e ino lallakiyera, dinurudda kappayino kasillalakirera. Antu gafuneno sinikkulanira i Dios andino lulubbundera, e antuweno mangipaita si ino ammera mangurug, kastigunirana i Dios si afuya ammena maaddap si makkikiyad.

**Ino Aggangweno Manulduwera Si Bakkanna  
Gakkurug Andino Kakastiguwandana**

<sup>8</sup>Udde kunna kepay inayino akwanino manulduwera si bakkanna gakkurug. Meampariyira si mattatenap, se ammera ammuweno akwanda. Darallandeno baggirangkepay sino narakkatta akwanda, ammera iyatallino naturay amma sikwara, e massapitira si narakkat mappeafu

sino anghelira. <sup>9</sup>Massiki ino afafuweno anghelira a i Miguel, awana turinna a mangwa si kunnenay. Se wasin nattukkiyera anni Satanas mappeafu nu inya sikwareno ana kalintiyanna a mappa sino baggiyi Moises, ammena nassapit si narakkat sikwana, nu ammena pelang sinapit si, “I Afu Diosino makammuwa mallang sikwam.” <sup>10</sup>Udde inayira a tolay, narakkattino sapitanda mappeafu sino massiki sanna a ammera maawatan. Mekunnera si animala ammera makadandam, se antu pelang maawatandeno panggammanino baggira, e antu kappeneno manaral sikwara.

<sup>11</sup>Kakallakkirana sino kattalatalawa kastigura. Se tuntulandeno narakkatta aggangwa i Cain,<sup>a</sup> ipagekwara kappaya manuldu si siriya kakunnenno aggangwa i Balaam<sup>b</sup> gafu sino kinainga'da si pirak, e kontaranda kappayino pangafuwandera a kakunnenno nangontarani Core ki Moises si'in.<sup>c</sup> Kastigunirana i Dios si makkikiyara kunna payino kakastiguwani Core.

<sup>12</sup>Ino kesapatanda sikwayuwa mangngan sino panandandaw sino natayani Jesus, meyamparig si mansa a manaral sino barawasiya nadalus. Nafulotino aggakkanda anna agginunda se awana talora ki Dios, se ino pelang baggireno dandamanda. Meyampariyira kappay si dulamma ipallerino bayabbag e awana da'nanda si uran. Mekunnera kappay si kayuwa ammena mammunga sino fustuwa pammunganna nad, onnu ino kayuwa natay e nafi'dutin. <sup>13</sup>Meyampariyira kappay si darokkalla palunggenno bebaya midaluyak si kaddadakkuta lulu sino ga'dangnga, se kanayunira a mangwa si ka'atatal. Ino tata kappaya keyampariyanda, ino bullalayawa mebulyat sino fustuwa pallakaranna. Antu gafuna, aneno kalalammukana pagyanana nedadani Dios si kebaluranda si makkikiyad.

**Ino Nelabbuni Enoc Mappedu Sino Kaukuman Annino  
Kakastiguwanneno Manulduwera Si Bakkanna Gakkurug**

<sup>14</sup>I Enoc a mekannamma afuwi Adam, aneno nelabbunna mappedu sikwara. Sinapi'na si, “Itandaw, gumamwangnga i Afu Dios a mibulun si parifurifuwera a nadosana anghelna <sup>15</sup>takesi ukumanna ammina tolay, e kastigunna ammina nalliawat a amme manandam sikwana gafu sino ammina inangwara a narakkat andino narakkatta sinapi'da a mekontara sikwana.” Antuweno nelabbuni Enoc. <sup>16</sup>Inayira a tolay, kanayunira a madadumul anna mangananawa. Ino pelang tuntulanda ino narakkatta

---

<sup>a</sup> 1:11 Itannu sino Genesis 4:1-8 anna sino 1 Juan 3:12    <sup>b</sup> 1:11 Ino istoriya mappedu sino inangwa i Balaam, ana sino Numero 22–24 anna sino Numero 31:16. Itannu kappay sino 2 Pedro 2:15-16.    <sup>c</sup> 1:11 Ino mappedu sino nangontaranda Core ki Moises, ana sino Numero 16:1-35.

panggammanda. Isangele'deno baggirangkepay anna atatundeno bafulundera takesi maappareno angganda.

**Ino Nelabbunino Apostolira A Ananeno Massan Manguruwira**

<sup>17</sup>Udde ikkayuwa iiddukangku, ammeyu nad kalyawanino nelabbunino apostolira i Jesu Kristo a Afutam. <sup>18</sup>Sinapi'da sikwayu si, “Naso kauddiyanira a aw, ananeno mappoporayira sino nadosan a manuntul pelang sino narakkatta panggammanda.” <sup>19</sup>Ireno mappakakaraway sikwayu.<sup>d</sup> Tuntulanda pelangino panggammanino nakandangkepay, se awan sikwareno Espirituwi Dios.

**Ino Nassapitani Judas Si Pattuyagganda Naddino  
Angngurudda Takesi Fustuweno Anggangwara**

<sup>20</sup>Udde ikkayuwa iiddukangku, pantatuyaggandawino angnguruddaw gafu sino padalandaw sino nadosaningke a tulduwa kuruwantam. Pefuyukkayu nad sino Espirituwi Dios sino pakkararandaw. <sup>21</sup>Ammeyu talekkuran onnu kalyawanino agganggammi Dios sikwayu, nu ammeyu lud anusana taronanino awa kaa'dandaw si biyaya mannayun gafu sino allakki Jesu Kristo a Afutam. <sup>22</sup>Allakkandonaddino maddaladudwera ta pattuyaggandawino angngurudda. <sup>23</sup>Ino korwanira paya mangurug sino bakkanna gakkurug, kunnangke ilasse'dawira nad ta mesalakira sino afuy. Ino minalliwatira pay, allakkandawira kappenad, udde ammayandawino liwa'dera, e palanandaw takesi ammekayu matutungguna manuntul sikwara.

**Ino Karara Paddayaw Ki Dios**

<sup>24</sup>Madayonaddi Dios a makadama a mimut sikwayu takesi ammekayu malliwat, e iyandakayuna so a'langnga a awaningkena a kabalawandaw anna nappelalo'nenno langga'daw. <sup>25</sup>Madayonaddi Dios se awana kakunnana e antuweno nangisalak sikwatam gafu sino inangwa i Jesu Kristo a Afutam. Antuweno kalalawarana matturay si ammin, annino mannakadama a Dios a awana kiyanneno kalintiyanna mangiyafu si'in, sito ingkein, anna si makkikiyad. Amen.

---

<sup>d</sup> <sup>19</sup> Ino tata kappaya anggama sapitan: Ireno mipassig sino baggira sikwayu.